

4. September 2026

Gschätzts Architekter- und Planigsteam
Gschätzti Fachlüüt, gschätzte Bauleiter und Bauherrevertreter
Gschätzti Mitglieder vo de Baukommission
Gschätzti Kollege us em Gmeindrot
gschätzti Nihal, als üsi Schuelleitig
Gschätzti Lehrpersone
Liebi Schülerin und Schüler

Jetzt gohts los!

Es freut mi, eui alli zu dem bsundere Alass, em Spatesicht für
das Generationeprojekt mit Chindergarte und Schulhuusdörfe
z begrüesse.

Mit em Spatestich goht nöd nur s Baue vo de neue Gebäude
los und die erstellte Plän und Konzept wo real werdet – nei,
mir setzt mit dem Generationeprojekt au es Zeiche für d
Zuekunft vo üsem Dorf und üsere Schuel Vordemwald.

Mit dene beide Gebäude für Chindergarte und Primarschuel
planet mir als Gmeindrot, churz- mittel- und au langfristig
gnüegend Schuelruum im Dorf z ha. Dodemit stellet mir nöd
nur sicher, dass au künftig Vorewäldler Chind ihri
Chindergarte- und Primarschuelziit dörfet im Dorf verbringe,
sondern au, dass Vordemwald au künftig e attraktivi
Wohngmeind blibt. Denn, was wäre es Dorf wie Vordemwald
ohni Schuel?

Ich bin überzeugt mit de neu Chindergäte und em Schuelhuus entstönd funktionali Lern-und Arbeitsrüm, wo d Chind au künftig guet werdet chönne lerne, kreativ si und d Lehrperson gern werdet schaffe. Domit sind mir au als Schuel Vordemwald wiiterhin en attraktive Arbetgeber. Denn was wär e Schuel ohni Lehrpersone?

Bis zum hütige Tag isch im Vorfeld vo de Planig vo some grosse Generationeprojekt einige Ziit vergange.

Im Jahr 2022 hät de Gmeindrot mit de Schuelraumplanig gsartet und analysiere loh, wie sich Vordemwald, au mit de Schüelerzahle, entwickle wird.

Im Mai 2023 het en Workshop mit de Bevölkerig zu de Resultat us de Analyse und fürs Sammle vo Idee us de Bevölkerig stattgfunde.

Im Oktober 2023 hät denn de Gmeindrot de strategisch Entscheid troffe, dass mer de Chindergarte künftig a dem Stanrdort, wo mir stönd, möchte ha.

Im März 2024 hät de Gmeindrot unterschiedliche Umsetzigsvariante prüft und sich für d Variante 3-fach Chindergarte, Schuelhuus, Doppelturnhalle usgsproche. D Bevölkerig hät denn im Juni 2024 am Planigskredit zugestimmt.

Anfangs 2025 isch es Wettbewerbsverfahre duregführt worde. Dodruss isch denn im Juni 2025 das vorliegende Projekt Benno Biber, vo Haller & Gut sowie Hunkeler Architekten als Sieger hervor gange.

Im November 2025 hät denn au d Bevölkerig jo gseit zum Neubau vom Chindergarte und em Schuelhuus und het em Baukredit für die erschi Etappe zuegestimmt.

Siither hät d Baukommission i zahlriiche Sitzige das Generationeprojekt konkretisiert, notwendige Entscheide troffe und uf de hütig Tag intensiv higschaffet.

Für das Engagement bedank ich mich bi allne Beteiligte ganz herzlich.

Allne vora em Stimmvolk fürs Vertraue is Projekt, em Architekto- und Planigsteam für ihri Idee und d Unterstützig, de Baukommission für di konstruktivi und zielgerichteti Zämmäarbet. En bsundere Dank goht möchte i an Chrigel Braun, Gmeindrotskolleg und mit mir Mitglied vo de Baukommission, usspreche. Chrigel, dini Inputs eracht i als grosse Mehrwert und ich schätz d Zämmäarbet mit dir sehr.

De Lehrpersone, de Chind, de Verein, de Bevölkerig dank ich jetzt scho für s Verständnis, wenne i de nögschte Mönat sicher ab und zue luuter isch als normal und gwohnti Abläufe nöd wie bisher stattfinde chönnd.

Aber au de Bauleitig und allne Fachpersone, wo die beide Hüüser werdet baue, dank ich jetzt scho für ihren Isatz und wünsche e unfallfrei Bauziit.

Irina Bannwart, Gemeinderätin Ressort Bildung